



KEMENTERIAN SUMBER MANUSIA

KENYATAAN MEDIA

SEMINAR TECHNOLOGY UPDATE: “DRONE TECHNOLOGY”

Seri Kembangan, 31 Januari – Jabatan Pembangunan Kemahiran, Kementerian Sumber Manusia dengan kerjasama SG Education Group dan Asia Drone IoT Technologies telah menganjurkan Seminar Technology Update: “Drone Technology” di Palace of The Golden Horses, Seri Kembangan. Seramai 50 orang peserta menyertai seminar ini yang terdiri daripada pengajar institusi latihan TVET dan pemain industri dari bidang seperti perkapalan, pembinaan, pertanian dan sebagainya yang terlibat secara langsung dalam bidang teknologi dron.

Tujuan seminar ini dianjurkan adalah sebagai salah satu platform perkongsian pengetahuan dan teknologi terkini dari pihak industri kepada peserta seminar terutamanya dikalangan pengajar institusi latihan TVET bagi membantu meningkatkan kemahiran mereka dalam bidang teknologi dron dan seterusnya meningkatkan kualiti modal insan graduan TVET.

Seiring dengan perkembangan teknologi dron di Malaysia, Kementerian Sumber Manusia melalui Jabatan Pembangunan Kemahiran telah berjaya membangunkan *National Occupational Skills Standard* (NOSS) bagi tahap 2 dan 3 dalam bidang teknologi dron yang telah diluluskan oleh Kerajaan pada 30 Januari 2019.

Perkembangan teknologi dron yang pantas telah memangkin kemajuan teknologi yang berkait rapat dengannya seperti *image processing*, *big data*, *robotics*, *automation* dan *mechanisation*. Ini secara langsung dapat memvariasikan kemahiran tenaga kerja yang terlibat dalam teknologi dron. Kemahiran bidang-bidang ini amatlah diperlukan bagi menghadapi fenomena Revolusi Perindustrian 4.0 (IR 4.0).

Kementerian Sumber Manusia telah merangka keperluan untuk mewujudkan kursus kemahiran lain yang bersesuaian setelah mengenalpasti corak industri dan keperluan pekerjaan era IR 4.0. Oleh demikian, kerjasama dari pihak industri amat dialukan-alukan bagi membantu kerajaan meramal keperluan pasaran tenaga kerja masa hadapan. Agenda ini adalah penting agar tenaga kerja negara dapat mengekalkan daya saing di peringkat global.

Harapan kerajaan adalah agar teknologi ini dapat dimanfaatkan sepenuhnya serta dapat menghasilkan graduan TVET yang lebih cemerlang dalam bidang teknologi dron.

###

Dikeluarkan oleh:
Unit Komunikasi Korporat
Kementerian Sumber Manusia
31 Januari 2019